


Presidente di Asociacion Amigos de Colombia, Hendrik Croes ta bisa:

“Ni si Chavez y e Consul di Venezuela” ta contra, nan lo instala scultura di “E Homber Condor”

Plaza di Bolivar ta un plaza cu gobierno di Aruba ta doño di dje, segun Croes



Riba e potret aki, sr. Hendrik Croes ta mustra e documentonan di DOW, caminda Asociacion Amigos de Colombia ta haya aprobacion pa instala nan monumento riba Plaza Simon Bolivar.

ORANJESTAD - Presidente di Asociacion Amigos de Colombia, sr. Hendrik Croes a cuestiona e hecho cu ainda nan no a instala un scultura di un homber cu ta transforma su mes den un parha (Condor) cu nan a manda traha na Colombia.

Sr. Croes a bisa cu esaki ta un gesto di agradecimento cu e colonia Colombiano a realisa pa agradece e pueblo di Aruba su hospitalidad. Durante un conferencia

di prensa cu a tuma lugar diabierna ultimo den sede di Asociacion Amigos de Colombia na Dakota, sr. Hendrik Croes a declara cu bou e mando di e directiva actual cu e ta presidi, nan lo bai instala e scultura menciona.

SCULTURA DI AGRADECIMIENTO

E directiva di e asociacion aki ya caba a tuma un decision unanime pa canalisa parti di e fondonan cu nan tin pa construi nan

sede asina yama “La Casa de Colombia”, pa instala e monumento aki. Sr. Croes a declara cu e ta desea di instala escultura aki lihe ya cu e ta haya “doloroso” cu un scultura asina bunita cu a costa un dineral ta benta den su cura di cas boca baou.

“Mi lo desea di wak cu e scultura di e Condor aki lo cuminsa bula. Mi lo desea di wak’e manera e ta, un scultura bunita cu a costa 33 miyon pesos”, asina el a manifesta.

Sinembargo den su declaracion, e ta lamenta cu Consulado di Republica Bolivariano di Venezuela a manda un carta pa e director di departamento di Relacion Exterior, unda nan ta manifesta cu nan ta contra pa e scultura aki lo wordo instala riba Plaza Simon Bolivar, unda ya caba nan tin un monumento di Simon Bolivar riba cabai.

Sr. Croes a bisa cu ademas cu nan a gasta 33 miyon pesos (mas cu 31 mil florin) pa traha e scultura aki na Medellin, nan a gasta mas cu 7 miyon den transportacion for di Colombia pa Aruba, y despues nan mester a gasta 1.200 florin pa asunto di belasting, etc... Pesei e ta bisa cu e scultura aki di e homber cu ta transforma



den un parha no por bai perdi, “ni si Chavez y e Consul di Venezuela ta opone contra dje”.

Pesei el a bisa cu si nan no ta haya un tereno ideal pa instala e monumento aki, nan lo pone riba e plaza di Bolivar, ya cu Asociacion Amigos de Colombia tin tur e documentonan aproba dor di nos autoridadnan local.

SOCIEDAD BOLIVARIANA

Ademas el a bisa cu actualmente ta existi un Sociedad Bolivariano cu ta pertenece na e paisnan Bolivariano, y esaki no ta un propiedad exclusivo di Venezuela, sino di e cinco paisnan Bolivariano.

“Nosno mester menosprecia e otro nacionnan, ya cu nos mester permanece uni. Nos mester respeta e demas regionnan di nos continente Americano y Caribe, y nos mester permanece uni y no separa for di otro. Nos

ta un pais democratico, y nos no ta acepta ningun sorto di dictadura, ni cu otro gobierno ta mishu cu nos gobierno”, asina sr. Hendrik Croes a bisa.

Den su declaracion, el a laga sa cu e plaza di Bolivar, unda nan a haya permiso caba pa instala e scultura di e Condor, ta un plaza cu gobierno di Aruba ta doño di dje, y gobierno di Aruba ta esun cu ta mantene e sitio ei tambe.

Sr. Croes a bisa cu un tal sra. Lopez cu segun e ta esun cu ta dirigi e Chavistanan aki na Aruba, hunto cu otro hendenan mas a bin bisa cu nan a pinta e plaza, y nan a haci otro trabounan di mantencion.

Riba e punto aki sr. Croes ta reacciona, y el a bisa cu e trabou aki a wordo haci dor di DOW, y si nan a yuda “bale la pena” ya cu nan ta Venezolano, y si nan lo a pidi ayudo di e Colombianonan, sigur nan lo yuda tambe.